

得耕堂政書

第十九册

退耕堂政書卷四十一目錄

函牘七

致宋都護三十四函

退耕堂政書卷四十一

天津徐世昌

函牘七

覆宋都護

迭接十六十八兩日來函藉諭壹是孟克西里卡倫叛兵滋事經
執事督飭勦捕爲時不久悉數就擒現已訊明正法並將被脅工
人另行核辦蓋猷所布諸協機宜曷勝心佩乃雜誦來函猶以辦
理不善深自引咎益見公忠體國錚錚如畏之忱定知鉏強析愿
宣德通情藍萼經營日臻周洽謙德彌光於茲券之
兩宮先後升遐

詔告迭見電鈔薄海臣民同深哀戚此間已於今昨兩日率領官
員紳耆先後舉哀成服除已電達外倫城應行禮節想亦由江省

轉行知照矣承惠樺碗營磨業經收到蒙旗工藝學坊方新銀工鑲嵌之技似此已不易得若得實業家倡導而獎進之或亦阜民之基也此間地方一切安謐倫城轄境得執事坐鎮蒙民必安靜如常也

又

頃據海拉爾鐵路界內華商中和成等號執事面稱俄自治會頭目告知路界內華商凡作買賣均向會上起一年票照其照費頭等三百吊二等二百吊三等一百五十吊至出牀子亦要起照納費等語並聞有另設巡警之事凡商會事件皆由自理不歸於官旋聞海拉爾俄自治會前令華商起票納費一事暫時未經提及近又開具華商字號清單經會首挨門親持囑令掌事人畫押並囑每星期赴會講論商情當經各該號向會首辯論以華商在華

境不能入於俄會抗阻過去又聞俄人在滿洲里亦設自治會云云此事迭據濱江道報告正由外部與俄使交涉該會何得遽令華商起票納費滿洲里海拉爾一帶均將設會直以爲彼勢力範圍之地斷難默視執事在倫耳目較近務希隨時詳查設法抵制以保主權又聞俄人雖倡此會至今未能實行是目前尚可挽回也所有該會目下情形並續有何等舉動卽望隨時見示爲盼鐵路巡警應速籌辦勿再延誤

又

屢奉來函備悉種切茲將商辦各件條覆如左

一邊墾局一案屢據尊處電咨各情形詳達外部與俄使交涉俄使頗以納稅一節不肯承認業將倫城收稅情形分別詳細達部現辦到如何地步尙未奉有部覆此事必須內外堅持以全

正書卷四十一
力與爭前已飭哈局一面向公司抗議俄外務官曾否回倫亦由尊處就近與之交涉近彼並欲將車站華人驅逐出外強橫無理至此已極萬勿稍存退讓以致愈難措手

一倫境僻處邊荒創辦各政在在需款故籌款爲惟一要義倫屬舊有之款以辦各項新政原覺不足而副都統暨各公司各局薪水當可就此支給現在既改道缺一切應添應併者亦須另行編定不能不通盤籌計俟省署酌定章程再行分別辦理

一邊款將次用罄現須續領四萬兩已函達周帥請酌撥發

一查勘邊境之員現在已否竣事開通道路入手辦法希詳細籌及

一沿邊陸路界址于道往查現抵何處有無報告情形

一現因公費未定辦公需款甚急所擬由稅款項下每月暫提八

百兩藉資應用之處卽准照辦

一滿站俄匪近稍斂迹仍希隨時嚴密稽查至俄兵持槍護送行旅之說雖未實行仍須加意察看以上各節均勞措注其有未盡事宜尙希隨時見商鄙人當力與維持也

又

前奉來函並咨文底稿暨俞委員調查各件均悉一切吉拉林沿邊一帶木植羊草皮張等項經俄人採取無人過問所失甚大現雖牧畜割草與俄人新定章程惟木植皮張尙未籌辦殊不足保我權利西北邊境未經開闢道路艱阻一切設施均未完備誠如來咨所云由我自行砍運目下萬辦不到惟有先行稽察使彼不得越界私取並定章收稅尙屬可行所擬開通道路添設卡倫自係握要之著已函達周帥查核施行俟尊處派員查明里數若干

需款若干詳覆到日再行酌定

又

接倫字第二號手書並鈔稿四件具悉種切呼倫一隅昔等荒漠今成重鎮經營草昧所望以實心毅力勉爲其難而已蒙民錮蔽已久然樸質堅勁是其特性若能逐漸化導數年以後當必改觀惟語言隔閼情意不孚最爲一大阻力計欲施教化當先謀語言之統一應於該地創設漢文學堂招徠蒙民子弟肄業其中規模不必闕大課程不必繁重但使辦理得法俾蒙民樂於從事將來造就有粗通漢文之人才於邊事卽有裨益尙希體察情形量爲舉辦延吉近況彼此仍在相持俄人於琿春尙無何等之舉動吉省諸務大致就緒現定二十六日起程旋奉年關在邇尙須料量一切也

又

疊奉第三第四兩號惠函備詳邊事呼倫貝爾僻居甌脫接壤強鄰謁蹶經營未容刻緩惟是蒙旗樸僣財政困難邊徼情形迥殊腹地操之過激或轉至阻礙事機足下於勤勞踔厲之中仍寓審慎圖維之意佩慰莫名司法行政機關爲整頓地方之綱領現既創設文案會計調查審判各局處以期逐漸推行原有蒙旗各官及向日例行事件自可暫仍其舊惟邊境寥闊仍當擇要設官以資鎮撫吉拉林額爾古訥河口及免渡河一帶旣經尊處察酌情形緩行議辦滿洲里迺扼塞之地稽察外商董勸實業當有專司仍當酌核設官分理其餘要地不能悉設民官則變通卡倫酌增官弁俾地利漸闢疆圉不虛亦屬利便之策惟沿邊物產似宜專由卡兵采售量徵其稅若遽定發照一任俄人采伐究恐易滋流

弊卓見以爲然否東省物產蕃殖采運寥寥固由民智之自封亦緣交通之不便來示擬創辦輪舟仿備各卡冰橈將以招徠墾戶濬闢利源此舉於邊事極有關繫尙冀賢勞肇畫早底於成至屯墾之利昔人言之綦詳耕牧並興尤爲不易之宏規兩全之善法果能蠲免押荒優予獎勵勸勸設墾牧銀行墊給墾戶資本進步之捷必越尋常所有邊防經費各項鉅款即可作爲該銀行資本藉資周轉台端久蒞邊疆洞觀時勢必能妥籌辦法用樹初基至倫境徧邇強俄鐵路商埠每多交涉緬想折衝樽俎諸費盡籌省垣相距較遠一切胥仗大力主持庶幾因應敏捷其滿洲里海拉爾博克圖各鐵路交涉分局亦可由尊處就近節制應由江省公署札該局遵行此外添募馬隊雜用滿蒙俾可漸聯情愫勸辦巡警簡定規則務期便於遵循以及措理民政調查實業規畫諸臻周

備建設小學以牖進蒙民文化與弟前函所論極相符合蒙民閉塞已久但期智識稍擴不涉歧途固未足侈語精深之科學也邊務紛繁百端待舉得執事同舟共濟宏此遠謨實深欣幸以公幹濟之才適膺盤錯正當屏除節目相見以誠一切行政用人均望力任仔肩統籌全局惟是要政敷施廣需經費比來俸餉欠減稅項亦復減收羅掘艱難深爲馳系苟有可以爲力之處必當設法籌助期於邊事有裨至省函所稱各節江省度支奇絀或非得已而邊地經營伊始車薪杯水斷難程功容當函商雪帥從長籌畫牲畜稅項提歸公用足徵涓滴靡私尊處公費自當另行籌備亦俟商之雪帥當可望有成議也

又

前日詳覆一函計邀青覽頃接倫字五號手書並張丞問答節略

一件具悉種切伐木一案俄人已退讓呼蘭河半年來所斷斷爭執者今竟稍有轉機向非執事成竹在胸堅持到底曷克臻此目下允給火燎溝一段俄人似無異言惟尙欲爭得河路耳卽由尊處酌核飭張丞力與磋商當易就範馭蒙之道今昔勢殊昔欲其愚今欲其智昔僅冀其不爲我患今並利其資爲我用振廢起衰事誠不易愚意威惠之外尤須以一誠字爲徹始徹終之主義果能情意相孚何事不舉執事洞悉邊情當不河漢斯言也

又

臘杪接倫字第六號手書具悉一一滿洲里與俄接壤俄匪任便來往肆行劫掠實爲邊境巨害況此後源源不絕若非設法清除爲患伊於胡底尊議辦法各條從根本上清查具見規畫精密防維周至已據情詳達外部請向俄使極力磋商俟如何定議再行

函佈該處添設官治並駐防軍實爲不可緩之圖否則僅恃空言毫無實力卽定有極完善之約章恐亦未能遵守尙希酌奪情形切實舉辦以期保安邊境固我主權邊防經費部中合江省前奏僅撥十萬萬難敷用容與雪帥再行籌商就現撥之數應如何分用之處或先訂購船隻或先擇地分布兵卡並目前應如何設法以防俄匪肆擾之處統望盡籌示復

又

接倫字第七號手書並圖二紙藉悉台從親赴滿洲里相度一切冰雪關山不辭況瘁賢勞軼掌傾佩奚如滿洲里設治以鐵路西面爲適當既可固我門戶而與車站距離甚近亦便稽查形勢利便當無逾於此將來詳加勘定卽可照此經營東北距吉拉林亦不甚遠尙可遙爲犄角惟沿邊地方寥闊屏蔽太疏誠如尊論所

云僅在二處設治照顧仍屬難周非多設卡倫不易收功應就沿邊一帶詳細察看規復舊有酌量增設以期漸臻完密目前作補牢之計雖未能力爭上游而步步爲營彼族尙有所顧忌不致如前此之聽客所爲也俄匪肆擾實爲邊患前已將尊擬辦法各節詳達外部請與俄使交涉現在防勦之計尙希隨時籌策以保治安札賴諾爾煤礦俄人開採出煤甚富自應按章收稅應由駐哈交涉局向鐵路公司結算至修造房屋所用地段亦當明訂限制以免任意展拓均照飭交涉局併案辦理所有邊地布置一切希隨時見示以慰馳系

又

接倫字第九號手書具見規畫沿邊苦心孤詣曷勝佩服慰當茲款項奇絀一切措置未能應手而他族橫厲之勢又已相逼而來不

能不於萬分艱窘之中求極力支拄之策東事全局同此情形倫
邊經營伊始尤爲急迫今擬將部撥十萬兩全數撥給呼倫一帶
邊務支用所有增設卡倫招徠墾戶應如何布置之處卽希悉心
籌奪開具辦法見示以便迅速舉辦來函議及沿邊荒地俄人越
墾亟應設法防維吉拉林至呼倫荒莽千餘里自不能不酌設卡
倫以資聯絡惟現在辦法須痛除舊日積弊不可如前之有名無
實執事毅力當能辦此滿洲里設官一節萬不可緩此處爲入界
第一站僅設一局事權較輕不足以資控禦應仍照前議速行籌
設爲幸江內船隻亦須購置以期往來便捷與陸路聲息相通諸
希一併妥籌邊事萬棘所望宏材幹略共任艱難積以歲月或有
起色耳

又

疊奉倫字十號十一號手書並咨稿及開辦設卡簡章均已展悉沿邊千餘里祇設二十卡倫尙覺單薄然目前款項奇絀姑就此數先行舉辦再圖擴充亦可收循序漸進之效惟此番整頓務須一新面目事事著實做去力祛舊日積弊庶不致徒有其名所望隨時留意悉心稽察至爲盼禱滿洲里地居衝要非設官不足控制現因款絀先行設局卽希從速開辦所擬將鐵路交涉局歸併邊墾局又倫城鐵路交涉歸併稅務局以歸併爲節省辦法極是一俟籌款稍有眉目滿站仍須設官以期鞏固所有倫城設邊墾總局滿站設邊墾局及沿邊分設卡倫所需經費已與雪帥籌商先在十萬兩內量爲撥發卽請先行舉辦其有不敷容俟續行籌撥邊事萬棘及今經營尙可爲力萬不因款絀而中止且不令執事獨任其難也沿邊物產尊議以卡兵數少勢難兼顧擬指定地